

Balansu femininu e maskulinu iha kosmolojia Timor nian (existensia Liurai feto sira Timor nian)

Antero Benedito da Silva

Sosiedade asia kompostu husi tradisaun familia rua: matrilineal e patrilineal. Matrilineal refere ema grupu ida ne'ebé husi ran husi viz avo feto ne'ebé hanesan (Mackerras 1995, 48). Patrilineal refere ba ema grupu ida ne'ebé iha relasaun-ran viz avo mane, iha timor, sira mak lidera uma-lisan. Colin Mackerras nota katak Minangkabau (Sumatera) sira pratika sistema familia matrilineal. Feto sira ne'ebé mai husi linea avo feto nian, hela hamutuk iha *Rumah adat* nu'udár unidade ekonomia basiku-liu iha Minangkabau (Mackerras 1995, 48). Bainhira feto sira kaben sira kontinua hela iha Rumah Adat avo feto nian, no mane sira kontinua parte ba sira nian Rumah Adat (Mackerras 1995, 49). Mane sira laiha responsabilidade domestika no ekonomia ba ninian oan no nian fen, maibe visita sira nian fen iha tempu kalan. Tia (Mamak) iha Rumah Adat mak responsabiliza ba ekonomia no servisu hotu Rumah Adat nian, no mane sira bele fo presente ba sira nian oan sira, ne'ebé parte ona ba Rumah Adat feto nian bainhira sira sei kosok-oan (Mackerras 1995, 49). Iha kazu Minangkabau knar feto nian boot-liu mane sira tanba responsabiliza Rumah Adat. Mane sira kontribui ba ekonomia iha Rumat Adat sira nian inan nian, maibe laiha kbiit iha Rumah Adat.

Kultura Minangkabau kontraria ho Xinese sira nian sistema familia. Bainhira kaben feto sira hela hamutuk nia-laen iha mane ninian inan-aman nian uma tanba oan mane deit mak kontinua linea familia nian, ne'ebé nian objektivu mak kontinua ejiste no moris diak (prosperu). Oan mane Xinese sira mak organiza ritual ba bei-ala sira, no hare ninian inan-aman nian moris loron-ikus nian. Feto-foun sira nian obrigasaun primaria mak serve ninian banin sira. Oan mane sira kaben jersaun ba jersaun, kontinua hela iha sira nian inan-aman (viz avo mane) nian uma, dapru ida deit no responsabilidade finansa komun, maibe oan mane boot mak xefia sira. Segregasaun generu mosu bainhira banin feto mak supervisa feto-foun sira, hodi hamenus komunikasaun entre fen no laen. Feto xinese sira moris ba benefisiu familia nian, ne'ebé benefisiu-liu mane sira (Mackerras 1995, 51-53). Feto Xinese sira nian knar mos barak mak domestika, duke ba liur, kompara ho feto Minangkabau sira, ne'ebé halo knar nu'udár lider klan ninian.

Friederic Durand (2009) mak temi kona-ba knar Liurai feto sira nian ne'ebé halao servisu publiku, iha Timor-Leste. Mgr. Carlos Filipe Ximenes Belo iha nian livro: *Os Reinos antigos de Timor* (2011) lista detalla-liu tan naran reino sira timor nian ho sira nian Regulo balun ne'ebé mak feto, maske la halo analiza kona-ba relasaun poder entre feto no mane. Durand (2009) no Ximenes Belo (2011) sai referensia primaria iha estudu ida ne'e. Helen Hill, akademiku Australina hakerek artigu resente kona-ba relasaun feto no mane iha servisu lor-loron hodi konklui katak lista servisu feto nian barak-liu mane sira nian. Feto halo servisu iha toos no natar, kuru be no hili ai-tein, soru tais no tein, halo dose, faan sasan sira iha merkadu no koidadu labarik sira. Mane sira halo servisu iha toos no natar, kasa, faan karau no kuda, tuku-besi, tesi-ai, futu manu e joga karta. Hill argumenta katak pratika ida ne'e hanesan lolos deit nasaun sira iha pasifiku. Maske Timor-Leste asseguru ona assuntu estratejiku sira relasiona ho feto, nasaun ne'e sei atraza-liu iha servisu pratika sira. Mane sira halo ona servisu reproduktivu nian, maibe sei limita deit ba hanorin labarik mane sira iha moris lor-loron (Hill 2011, 216-17). Kausa ida mak Timor-Leste mos hetan influensia husi Portuguese ne'ebé ho kultura semi-feudalisku iha epoka kolonial nian. Kompania Portuguese sira interese-liu ba servisu mane sira nian duke servisu feto sira nian. Maske feto sira halo servisu domestika iha uma, sosiedade la-konsidera ida ne'e nu'udár servisu, maibe dehan katak feto sira hela iha uma deit katak la halo servisu. Ne'e katak sosiedade la konta feto sira nian servisu domestika no servisu seluk ne'ebé sira halo afavor mane sira (Hill 2011, 216). Autor argumenta katak kosmolojia Timor nian afavor balansu knar femininu no maskulinu, ne'ebé iha pratika justifika husi; Dahuluk, ejistente Lisan Matrilineal (Galolen, tetum Terik, no Bunak) no patrilineal (eg. Mombae, Makasae, Fataluco no Naueti). Daruak, feto lubun ida ne'ebé assume kargu Liurai Feto inkluidu iha komunidadade sira ne'ebé patrilineal iha Reino Antigo sira timor nian, maske hetan evolusaun ba kultura feudal nian. Iha lisan Fetsa-Umane familia patrilineal nu'udar mos sistema ida ne'ebe hatudu balansu, dependenti e mutual entre kna'r feto no mane.

Demografia Timor antigo

Maske komunidadu umana horik nanis ona iha rai-ketan Timor kuaze tinan 35,000-50,000 ba leten, katak antigu liu, kompara ho rai-ketan Sunda kiik sira nian (Hagerdal 2012, 15), Timorensu sira la hakiak kultura hakerek no lé. Nune'e susar tebes ba ita ohin loron atu hatene kona-ba posisaun fetu ida komunidadu antigu timor nian ho lolos. Iha dalan hat mak ita bele uza hodi halibur dadus, ne'ebé karik laos kompletu maibe bele tulun ita hodi estabese konelementu basiku ruma kona-ba estrutura sosial no relasaun kbi'it (relacao poder) iha sosiedade Timor antigu nian. Dalan sira ne'e mak: istoria oral, etnografia antropologu uluk sira, estudu arkeolojika, no analiza kona-ba relasaun fetu no mane iha sosiedade aktual liu husi lisan uma-fukun no fetsa-umane sira. Faktu hatudu katak maioria sosiedade Timor nian pratika kultura patrilineal, no matrilineal mak iha Uma-Lisan sira: Galolen, Bunak no Tetum Terik hodi halo ekuilibra ho sira seluk mak moris iha kultura patriarkal, ne'ebé mos la signifika mane sira hanehan fetu sira nian direitu.

Populasaun antigu timor nian moris husi kasa animal fuik, kuu-aifuan fuik sira, kaer ikan no agrikultura (Durand 2009, 25). Aihoris dominante-liu mak: Palmeria sagu (metroxyton sagu), talas (taro) (Colocasia esculenta), tua akar midar (arenga pinnata), no dala barak inklui lagrima job nian; Lagrima job (coix laccryma so--cereal) neebé bei-ala sira uza duni maibe nian moris fuik deit (17400 years ago) (Durand 2009, 25). Populasaun sira halo ona furnu husi rai (xanarai) hatudu kultura tein ne'ebé oiain ona (culinarias complexas) (Durand 2009, 25). Tinan rihun antes Ano Domino timor oan sira halo ona kontaktu ho nasaun sira seluk iha Asia hodi aprende kona-ba tuku-besi, hetan tambor (Drumb) modelu Dong Son Vietnam no sira mos faan aikameli (Santalum album) ba Reino antigu Sri Wijaya, Majapahit hodi lori ba India no Xina. Textu Xinese nian Tao-I-Chih-Luch (Testamunhas of insular nations) 1250: " Iha foho lolon sira ne'e aikameli moris buras-los. Ai ne'e uza hodi troka ho osan mutin, besi, bikan fatuk, hena ne'ebé halo ho algudaun husi India, no mos hena taffeta ho kor oiain (Durand 2009, 36).

Laiha dadus unifika kona-ba populasaun Reino sira Timor nian, maibe: Dom Carlos Filipe Ximenes Belo (2011) identifika habitants Reinos balun mak total maizumenos 600-750,000 finais sentenariu 19 nian (1850-1891), maibe iha periodu entre tinan 1860 a 1912 akontese revolta iha Vemasse, Lermean no Saniry (1867); Revolta Balibo husi Dona Maria Pires Cova (1868) ne'ebé Portuguese mobiliza 2000 resin militar hodi halakon Cova; Revolta Moradores iha Dili 1887; Revolta Reino de Maubara; no Funu Munufahi mesak deit mak hamate ema 20000. Iha periodu ida ne'e mos akontese funu iha fatin seluk inkluidu Funu Bina-Buraboo (Revolta Dom Simao Vessoru) nian 1901 ne'ebé mos hamate ema barak maibe la rejistu,

Iha periodu tinan 1926-1937, konsektivu Governadores Portuguese nian dezenvolve politika realokasaun komunidadu 'aldeias indigenas' ba area determinadu sira iha terras baixos hanaran: Knua indigenas, ne'ebé mos kausa ema lubun mak mate. Povoação ida naran Burabohae iha Posto Tualo lakon ninian populasaun 500-1000, alias mate massal tanba hetan moras iha fatin realokasaun ba area tasi, Como-Oli tinan 1930 nune'e. Posivelmente fatin seluk mos esperiensa situasaun trajiku hanesan ne'e iha periodu refere, hodi kontribui ba reduzasaun populasaun timor nian. Enkuantu tinan 1930 populasaun Timor nian mak 472,221 numeru ida ne'ebé reduzida ona husi maizumenos 750,000 (1891), no Funu mundial daruak mos hamate 60000 ate 80,000 populasaun. Bainhira funu hotu, Portuguese sira halo sensus no identifika katak total populasaun mak 433,412, katak timor lakon tan 40,000 iha funu mundial daruak. Revolta 1959 pelemenos ema 1000 mak mate no kuaze 70 pessoas mak deportadu ba Portugal no ba Africa. Dalaruma populasaun barak mos mak mate entre periodu pos-guerra nian, husi funu ida ba funu seluk tanba hamlaha no moras ne'ebé la identifika, hodi influensia tanba sa mak populasaun timor nian 650,000 iha inisiu tinan 1974.

Lista Habitantes Reino sira nian tinan 1850 to'o tinan 1891 mak hanesan tuir mai ne'e: Reino Aileu rejistu 13,000 habitantes tinan 1850; final sentenariu XIX (1890an) Alas nian populasaun 40,000; Balibo 12,000 habitantes tinan 1769; Reino de Saniri-Balibo 12,000 habitantes 1850; Reino Cova-Balibo 8,000 habitantes tinan 1890s; Reino Batugade (anynim); Reino de Barique 15,000 habitantes tinan 1850; Reino de Bibico-Barique 4,500 habitantes 1850; Reino de Baucau 2,000 habitantes 1891; Bobonaro (Bobonaro, ai-assa, Marobo, no Hauba); Cailaco 36,000 habitantes 1850; Dili Motael 3,000 habitantes 1858; Reino Hera 1800 habitantes 1850; Reino Ermera 2,000 habitantes 1850; Reino Fatumaca 3,000 habitantes 1891; Reino Fatuberliu 4500 habitantes 1850 (Reino Claca no Caicassa:

anonym); Fatumean (anonym); Fatululic (anonym); Fohorem (anonym); Deribate-Hatolia 12,000 habitantes 1850; Reino de Leimean 5500 tinan 1850; Reino Mauhubo (Mau-Ubo) 2,000; habitantes 1891; Hatudo (anonym); Reino de Lacllo 5500 tinan 1850; Reino de Laicore 1200 tinan 1850; Reino de Laclubar 16000 tinan 1850; Reino de Funar 6000 tinan 1850; Reino de Lacluta 11000 tinan 1850; Reino de Laga 21000 tinan 1850; Reino de Larisula (anonym); Reino de Laleia 28800 tinan 1850; Reino de Cairui 4500 tinan 1850; Reino de Lautem e Moro (Sarau) 35,000 e Reino de Faturu 32,000 tinan 1850; Reino de Lequica 7000 e Reino de Boibau 4500 tinan 1850; Reino de Lolotoy (anonym); Reino de Maturrufo-Lospalos 18,000 tinan 1850; Reino de Luro 3000 tinan 1891; Reino de Manatuto 9000 tinan 1850; Maliana mak Regulado Memo (anonym), Reino de Maubara 2000 tinan 1883; Reino de Maubesse (anonym); Reino de Oecusse 29000 tinan 1850; Reino de Ossoroa e Ossu de Cima (anonym); Reino de Remexio Caimauc 7000 e Reino de Remexio Manumera 7000 tinan 1850; Reino de Manufahe 36000 tinan 1850 e Reino de Faturu 2000 tinan 1883; Soibada-Reino de Samoro 27000 tinan 1850; Reino de Suai 38000 tinan 1850; Reino de Turiscaí 18000 tinan 1850; Reino de Foholau 1800 tinan 1850; Reino de Failocor 20000 tinan 1850, Reino de Vemasse-Ade 30,000 tinan 1850; Reino de Ossoquel 1200 tinan 1850; Reino de Venilale 42000 e Bercoli 5500 tinan 1850; Viqueque 36000, Luca 38000 e Bibiluto 9000 tinan 1850; Zumalai Raimean 30000 e Fatulete-Luli (anonym) tinan 1860, Vessoru no Matebian (anonym) (Ximenes Belo 2011). Karik populasaun reino rua ikus ne'e inklui ona ba Reino Luca iha periodu ida ne'e, hafoin submisaun liu husi sirkulasaun presente (Rota).

Balansu feminimu e maskulinu iha kosmolojia Timor nian

Ita seidak hatene se deskrisaun visitantes antigu sira mai timor ne'e representa sociedade tomak timor nian. Iha uma-fukun balun iha Timor laran, ita bele hetan alokasan fatin ba fetu no mane, ezemplu Odamatan Mane no Odamatan fetu nian, ne'ebé maizumenos hatudu tratamentu hanesan ba fetu sira no mane sira. Iha sistema fase karau-nian ain, kultura Naueti, fetu sira no jersaun foun sira simboliza fertilidade no regenerasaun, no sai atensaun iha serimonia no sira mak importante-liu. Naueti, Uaimá no Makasa'e hakiak istoria antigu relasiona ho sira nian orijin husi foho-Matebian tutun ne'ebé reflète sira nian presensa antigu iha Illa ida ne'e. Estrutura sosial politika ukun timor nian diferenti husi Reino ida ba Reino seluk. Frederic Durand, historiador Franses nian temi kona-ba Wewiku-Wehali ninian dominu iha Rai Klaran Illa Timor inkluidu area Tasi Norte no Sul (maioritaria area Tetun Terik, Bunak, Kemak, Mombae, Tokodede no Reino Samoro), mak ninian influencia boot liu (Durand 2009).

Ohin loraun sociedade matrilineal sei hetan iha Tetun terik, Bunak sira, ne'ebé fetu sira iha kbiit boot liu. Wehali konsideradu nu'udar rai fetu nian (female land), ne'ebé haleu ho foho mane sira nune'e mos haleu ho tasi-mane parte sul no tasi fetu iha parte norte rai-ketan nian. Parte Sul Belu (iha Kupang) ne'ebé sai sentru ba Reino Wewiku-Wehali ninian karakter matrilineal no sira mak sei hatutan posisaun politika to'o ohin loraun (Hagerdal 2011). Posivelmente expressaun termu Liurai mai husi influencia dominu Tetun Terik no Wewiko-Wehali nian, ne'ebe Matebian sira konsidera nu'udar Fetu-san (jersaun fetu nian) iha sira nian tradisaun lisan.

Durand haktuir katak estrutura politika Timor nian kompostu husi Liurai ne'ebé eleitu husi Datu-uain sira, ne'ebé iha mandato kaer relasaun Externa; Dato sira mak forma Assembleia Konsultativu ida ne'ebé responsavel ba assuntu interna, Ema babain, no Atan sira. Liurai sira hakruk ba desisaun Dato-Uain sira nian, tanba ne'e, Durand bolu Republika Aristokrata (Durand 2009, 44-97), katak republika ida ne'ebé liderada husi ema matenek sira. Ema babain sira mos, bainhira iha kualidade no hatudu lideransa, sira mos iha possibilidade atu sai datu ou Liurai. Gunn mos konfirma katak atu komprende diak-liu dinamika sociedade timor nian, importante atu komprende sira nian sistema politika. Liurai ou Raja kaer poder supremo, ba ninian povu, no nian suksesor sira various husi Reino ida ba seluk, maibe em prinsipiu hereditary katak husi jersaun ba jersaun. Bainhira laiha oan mane, fetu sira kaer ukun. Tuir Liurai mak dato sira, Toumougon no Labo (atan) (Gunn 1999, 35). Durand mos argumenta katak relasaun ida akompana mos ho Fetosa-Umane. Umane sira ne'ebé oferese fetu, sira nian estatus superior-liu iha parte balun kompara ho fetu-san sira ne'ebé oferese mane ne'ebé hametin tan ukun reino timor nian. Fetu-san sira mos laos komplimentariu iha relasaun ida ne'e tanba iha parte seluk sira mos umane ba sira nian fetu-san sira. Maske nune'e, barlaque nu'udar tradisaun comunidade patrilineal, duke matrilineal.

Iha ne'e posivelmente Durand no Gunn halo analiza klean-liu ona baseia ba modelu ukun

Wewiku-Wehali nian ba kultura seluk minoria iha Timor-Lorosae. Iha Ponta Leste, Matebian (Makasae-Naueti) la hatudu iha Mapa ida ne'ebé Portuguese produz iha final sekulu XIX nian (Durand 2009, 96), maske Dom Carlos F Ximenes Belo (2011) haktuir katak Liurai Portuguese nian fo premiu ba Reinu Matebian, no ejiste karik lisan Matebian nian kona-ba ukun, antes sira halo tratadu ho Reino Luca no Vemasse. Historia oral lokal nian mos koalia kona-ba Reino Bina-Buraboo nian jurisdisaun mak comunidade naueti ho nian jersaun sira mak tuur iha Kiakoki Kasabau-Borabo'o (Likaiboka) nu'udar Segundo Reino boot hafoin Matebian, ne'ebe naksobu tinan 1901. Balun mak iha Beli-Darlari ne'ebe mos maun-alin ho Luca no balun deslokadu ba Beaco no fatin seluk iha Kaibada Naueitu no seluk tan. Naueti sira bolu Ana-Asukai Ana-Ulu, oan mane boot ne'ebé iha direitu atu sai nu'udar lider uma-lisan. Maske nune'e, ukun ne'e laos automatika. Tio sira (orijin) no fetosan sira hotu nian representante tuur iha oin mak halo eleisaun ba Oan Mane sira, maske oan mane boot mak iha possibilidade boot-liu sai lider uma-lisan nian. Hafoin hili oan mane, Umane no fetosan sira hili Lian-nain husi oan mane sira hodi tomakonta tesi-lia iha knua nian laran. Oan mane boot no Lia-nain mak sai servidor atu hare tuir fetosan no tane-as tio sira Uma-Lisan ninian. Iha kultura Sarau (Fataluku) nian, estratifikasaun sosial baseia ba klan mak Ratu (Rahu-Maun) ne'ebe iha posisaun aas no maoria iha rai ne'ebá, Pach (Alin), no akanu (ema seluk/ema babain). Klan sira ne'ebé konsideradu Ratu (maun) mak kaer ukun iha sosiedade Fataluku nian.

Komunidade Patrilineal

Historia oral, partikular-liu kona-ba geneolojia origin uma-fukun patriarkal sira nian, feto sira barak liu nakfilak-an husi aihan ou animal sai menina-feto bonita, hafoin kaben ho mane klosan sira. Ita foti ezemplu balun hodi esplika kona-ba ida ne'e. Komunitade makasae-Matebian, Maluro haktuir sira nian istoria oral katak sira nian avo feto mai husi Kakatua bin-alin nain hitu (7) ne'ebé nakfilak-an sai feto bonita hitu, no ida ikun mak kaben ho sira nian avo mane Maulero, hodi nian bei-oan sira ohin loron hela haleu Foho Matebian, iha Maluro Lospalos no Laleia-Vemmase nian. Uma-fukun ida naran Uma-Timur, iha Vessoru haktuir katak Lakeru ida mak nakfilak-an sai feto bonita ida hodi kaben sira nian viz avo mane. Nune'e lulik lakeru, ka la han lakeru tanba konsidera nu'udar sira nian orijin. Iha Laga, comunidade balun ninian avo feto mai husi lafaek hitu, no ida ikun mak nakfilak-an ba feto bonita hodi kaben sira nian avo mane.

Historia hirak ne'e haktuir kona-ba enkontru mistiku entre ema umana no natureza, ne'ebé karik hateten kona-bá intimasaun relasaun ne'e, hodi conserva vida umana iha tempu uluk nian. Entre comunidade umana no natureza-aihoris, anin, rai, tasi no fitun, fulan no Loro, la iha separasaun entre mundu nakukun no mundu naroman, maibe iha relasaun metin. Iha momentu balun ema bele sai ba animal sira, no iha momentu balun animal no aihoris bele nakfilak ba ema kriatura.

Komunidade Matrilineal

Ohin loron comunidade sira ne'ebé moris iha lisan matrilineal mak Galolen iha Manatuto, Komunitade Bunak, no Komunitade Tetun Terik iha Suai, Balibo, Atambua e Same. Kontraria ho istoria oral husi Matebian nian, istoria oral Galolen nian haktuir katak feto bonita nain tolu hela iha rai naran Malarahun. Feto ne'ebé boot liu mak hela iha Uma-Fuku Dirihun. Loron ida mosu manu aman mutin ida, mak nakfilak-an ba Mane Bonito ida. Mane ne'e mak kaben ho feto boot ne'e hodi rai ne'e hanaran Manututo (Manatuto). Sira nian jersaun fahe ba fatin barak iha rai Timor. Tanba feto sira mak hela uluk iha rai ne'ebá, nune'e feto sira mak kaer kbiit no hein uma-fukun iha comunidade Galolen. Bainhira mane sira kaben sira tenki muda ba sira nian fen ninian uma-fukun. Sira nian oan hotu tuir lisan fen sira nian, no oan mane sira kontinua respeita sira nian feto sira ninian autoridade. Bainhira, fen sira mate karik, osan sira sei tuur hamutuk, halo desisaun, se sira nian aman bele hela nafatin ho nian oan sira ou fila hikas ba ninian feto sira.

Komunitade Tetun Terik Fatuberliu nian istoria oinseluk oituan maske sira mos matrilineal. Bainhira feto no mane sira kaben, feto sira mak iha kbiit liu iha uma-fukun sira nian, no mane sira kontinua parte ba ninian uma-fukun orijinal. Sira tenki fahe oan, no feto sira iha direitu hetan barak liu mane sira. Se oan barak, mak mane sira hetan ida deit, no restu feto nian hotu. Situasaun ida ne'e hamosu resistensia husi mane sira, no ikus mai mane sira bele hetan direitu ba oan rua, husi oan barak.

Testamuna etnografiku kona-ba fetu Timor

Testamuna antigu ida kona-ba lalaok fetu sira nian mak husi hakerek Dao Yi Zhi nu'udar Xinese ida ne'ebe visita Timor tinan 1350, tanba hakarak hatene ejistensia sandalu iha timor. Dao Yi Zhi hakerek konaba fetu Timor nune'e:

The women are shameless. The tribal chiefs are fond of food, wine and sex, and when sleeping they do not cover themselves so that those who get infected [by diseases] die for the most part... Tradusaun autor nian: Fetu timor sira laiha moe. Liurai sira gosta mak hahan, tua no seksu, no bainhira toba sira la taka isin nune'e sira ne'ebé hetan moras mate barak tebes (Hagerdal 2011).

Observasaun Yi Zhi nian haktuir momos kona-ba "nai-ulun/liurai" nu'udar sujeitu-aktor iha historia interasaun ho Yi Zhi, iha knua sira ne'ebé nia visita. Fetu ninian posisaun mak oferese aihan ba visitante sira no oferese seksu ba mane sira, no dehan katak fetu timor sira laiha moe, maske molik deit. Karik ida ne'e signifika katak iha epoka ne'ebá feudalismu komesa sai kultura politika ida ba sociedade balun iha Illa Timor. Timor oan sira seidak fo importansia ba hatais, no sira seidak kreativitu iha soru tais.

Maixumenos tinan atus ida tuir fali, Italianu Antonio Pigafetta (circa 1491-1534), ne'ebé visita mos Reino Amanubang iha Kupaun no reino sira iha area tasi nian, hodi haktuir ninian observasaun ne'ebé maizumenos hanesan ho Yi Zhi ninian: Pigafetta hakerek:

The chief with whom I went to speak only had women to serve him. [The women] all go naked, just like the other [women on the other islands]... Nai-ulun ne'ebé hau koaliala ho, fetu sira deit mak serve nian. (Fetu sira) hotu molik, hanesan mos fetu sira iha illa seluk.

Hagerdal (2012, 17), antropologu Olanda nian, iha ninian publikasaun foin lalais ne'e: *The Lords of Land, the Lords of Sea (Liurai rai nian, Liurai Tasi nian)* hato'o ninian observasaun: "The alleged nudity of the women (and, apparently, the men) is more puzzling, when regarding the long sarongs worn more recently, but it corroborates a Franciscan travel account from 1670... deskrisaun fetu molik (no mane molik) sai aiknanaik bainhira ita hare ba sarong naruk sira ne'ebé sira hatais foin-lalais ne'e, maibe ida ne'e inkorpora iha Franciscana ida ninian vijajem tinan 1670."

Maske antropologu sira ne'e halo deit deskrisaun ba fetu sira ne'ebé servisu iha Liurai sira ninian uma, partikularliu Reino Amanubang no sira la hare relasaun fetu no mane iha sociedade tomak. Sira hatoo ona deskrisaun ida maizumenos los, kona-ba epoka kultura feudalismu ne'ebé hatuur posisaun fetu nian nu'udar traballador iha dapru no objetu seksu no sensu furak iha uma, maibe deskrisaun ne'ebé mos limitadu ba Reino sira ne'ebé visitante sira nee sama-ain ba, no la hatoo deskrisaun ida kona-ba Timor tomak.

Nai-fetu Timor nian iha sekulu XII-XIX

Fetu lubuk ida mak kaer ukun nu'udar Nai-Fetu iha sentenariu XVII-XIX nian. Reino Ambeno mos dehan katak lidera husi Rainha ida 1641 no hela iha Nuno-Heno (aktual Padeai), Oecusse. Pe. Frei Antonio de Sao Jacinto mak sarani Rainha ne'e ho nian oan mane Dom Pedro tinan 1641, ne'ebé tinan 1703 revolta kontra Portugese (Ximenes Belo 2011, 256). Revolta ida ne'e konesidu ho funu kontra finta. Governador Portugese Antonio Coelho Guerreiro mak hahu fahe presente ba Reinos sira ne'ebé dehan katak loyal ba koroa Portuges tinan 1701-1703, ho hamasu titulu militar: Brigadeiro, Coronel/a, Tenenti Coronel, Captao, Major, Sargento, Cavo (Durand 2009, 63). Hafoin ida ne'e Portuges sira hahu kolekta riku-soi liu husi politika *finta*. Liurai sira la haksolok ho politika kolekta riku-soi ida ne'e, hodi halibur malu iha Camenaca, halo juramentu hemu-ran, no foti kroat hasoru ukun kolonial nian husi tinan 1719-1769, durante tinan 50 nian laran. Iha periodu ida ne'e no tinan limanulu tuir fali, Reino rua, Luca no Venilale ne'ebe iha relasaun ho Luca mak hatudu lideransa fetu ne'ebé dominante tebes.

Entre tinan 1642 a 1645, Padre Antonio de S. Domingos, OP sarani liurai fetu Luca nian, ho nia oan mane menor idade ida (Durand 2009, 327). Tinan hirak tuir fali 1670 dehan katak Liurai fetu ida mak ukun Luca no Nai Fetu ne'e hasorumalu dala tolu ona ho Dominicano sira maibe nia husu fali mak Jesuita sira nian presensa (Durand 2009, 330). Liurai fetu Maria lidera Reino Luca nian ne'ebé kaer ukun entre 1779-1810, revolta Portugese nian dominu tanba Portugese husu *reino* (imperiu kiik-oan

sira) hodi selu *finta* (taxa). Funu ne'e hanaran "a guerra dos malucos/bulak sira nian funu" (Durand 2009). Frederic Durand haktuir:

De 1779 ate aos anos 1810, o reino de Luca na costa sull resistiu a Portugal no que foi chamada 'a Guerra dos malucos'. No final desse periodo, a luta foi dirigida pela Rainha D. Maria. Convictos da sua capacidade de Resistencia, os timorenses conservaram a tendencia de nao obedecer a coroa portuguesa. Em 1810, apenas 16 reinos timorenses ainda pagavam a finta (Durand 2009, 71).

Tanba funu Luca lakon Venilale parte ba ninian jurisdiasaun, ho Venilale sai Reino independente. Mgr. Ximenes Belo, identifika Luca nu'udar Reino ida ne'ebé iha Costa Sul ne'ebé feto lubun ida mak Lidera:

- 1) Rainha Nai Lou Baria Sak hetan sarani 1642-43.
- 2) Nai Lurai Lequi Sak mak ukun Luca 1670;
- 3) Nai Liurai Lulequik I (antes 1702).
- 4) Rainha Dona Ana do Amaral (1815)
- 5) Rainha Dona Maria do Amaral (1826-1850)
- 6) Rainha Dona Rosa do Amaral (1881) (Ximenes Belo 2011, 330-336).

Dokumentu Portugues ida loron 28 fevereiru 1815 lista Reino Timor nian hamutuk 55 no Reino 13 (sanulu resin tolu) mak lidera husi feto:

- 1) Reino de Ala Coronela Rainha Dona Liberata da Costa;
- 2) Reino de Erimeira (Ermera) Coronela Rainha Dona Dam;
- 3) Reino de Samosas (Samoro) Coronela Rainha Dona Guimar de Amal (Guiomar do Amaral)
- 4) Reino de Bibico Coronela Rainha Dona Mariana da Costa.
- 5) Reino de Luca Coronela Rainha Dona Anna do Amaral
- 6) Reino de Lacro Rainha Dona Rosa de Carceres
- 7) Reino de Dotte (Dotic) Coronela Rainha Dona Catharina de Carvalho
- 8) Reino de Laycore Coronela Rainha Dona Anna da Rosa
- 9) Reino de Vemmsae Coronela Rainha Dona Simao dos Santos Pinto.
- 10) Reino de Bibiluto Coronela Rainha Dona Isabel de Carvalho de Silva
- 11) Reino de Funar Coronela Rainha Dona Esperanca dos Santos Pinto
- 12) Reino de Elaco (Clacoc) Coronela Rainha Dona Vicente da Costa
- 13) Reino de Larantuca Coronela Rainha Dona Lourenca Goncalves (Ximenes Belo 2011, 36-37).

Maske Vemasse no Venilale ne'ebé ninian kultura patriarkal, feto balun mak kaer ukun nu'udar Nai Feto. Iha periodu 1815, Dona Simoa dos Santos Pinto kaer knar Rainha iha Reino Vemasse 1815 (Durand 2009, 307). Reino Venilale ne'ebe hamutuk Luca ate 1810 mos hetan ukun husi Nai Feto nain tolu: Dona Catarina de Freitas (1808-1812); Dona Izabel Guterres (1874, maibe iha period 1881 Dona Izabel Guterres simu juramentu hamutuk ho Dom Duarte Guterres hodi sai Liurai iha Reinho Venilale. Feto ida tan mak ukun Venilale Dona Maria Freitas Guterres no feto ikus liu mak Dona Ursula Guterres (1897) (Durand 2009, 313-315).

Tinan 1871 Dona Maria Micaela Doutel da Costa mak Lidera Reino Balibo, no simu juramentu husi autoridade Portugues Governador Joao Climaco de Carvalho iha Batugade (Ximenes Belo 2011,118). Besik Balibo mak Reino Cova (Kowa) ne'ebe tinan 1870 lidera husi Rainha Dona Maria Pires ne'ebe dehan katak Liurai Portugal fo presente ofisial ho Grau Torre de Espada tanba ninian esforsu eroika atu obedese ba ukun Portuguese nian, ne'ebé ikus mai presente ne'e la intrega. Dona Maria Pires ho apoiu Reino sira seluk, ataka tranquera Cova, sunu e hatun bandeira Portugues. Tanba Rainha nian oan mane ida Braz Feliciano Ribeiro Pires hetan edukasaun iha Dili, entaun Dona Pires ikus mai obedese fila-fali ukun Portuguese nian. Maibe tinan 1895, dala ida tan Reino Cova oho Capitaio Portugues Eduardo da Camara no ninian ulun tara ba au-hun (Ximenes Belo 2011, 120). Hera ne'ebé ninian jurisdiasaun inklui Atauro lidera husi Dona Izabel tinan 1726 (Ximenes Belo 2011, 151). Laclubar dehan katak parte ba Samoro, maibe tinan 1850 Ministro da Marina Portugal hatoo informasaun katak Reino Laclubar iha ema 16,000 no ninian regulo selu finta 12\$900 reis, no ema nain 5 (lima) nu'udar auxiliariu. Tinan 1883 Liurai feto ida mak ukun Reino Laclubar Coronel Rainha ne'ebe simu juramentu husi Liurai Portugal liu husi Governador Dom Sebastiao Tavares (Ximenes Belo

2011, 185). Dona Maria ne'ebé revolta kontra dominu Portuguese nian no duni sai ema mutin Portuguese sira iha Lacluta tinan 1812 (Ximenes Belo 2011, 189). Liquica nu'udar Reino ne'ebé patriarkal maibe tinan 1883 Nai Feto ida naran Dona Gracia da Costa Rodrigues mak simu juramentu sai nu'udar Coronela no tinan 1891 feto ida tan Dona Usula da Costa sai Rainha iha Liquica (Ximenes Belo 2011, 214). Besik mai Liquica mak Reino Maubara ne'ebé Rainha Dona Maria Izabel mak simu juramentu husi Liurai Portugal liu husi Governador Celestino da Silva hodi kaer ukun tinan 1897.

Durand mos halo kritika ida katak Portuguese sira hahu halo intervensaun uza kultura patriarkal no dominu mane sira, hodi hamenus papel feto nian iha jestaun reino timorenses sira nian, hahu husi sekulu XVIII nian. Bain-hira dato-sira hili tiha Liurai feto ida, entaun Portugues sira impoin sira nia kultura no indika mane ida nu'udar regente (vice) ba ukun nain feto sira ne'e (Durand 2009, 97). Portuguese sira sirkula presente ba Reino sira ho titulu Coronel ba Liurai sira, no dato sira simu titulu militar Captao, Cabo, maior e Sargento sira (Durand 2009, 97), nune'e sira halakon neneik papel feto sira nian iha sociedade. Governu Portuguese fo juramentu ba Liurai Coronel Dona Senhorina Pimental sai Nai Feto iha Reino Foholau, Turiscao nian 1884 (Durand 2009, 298; Ximenes Belo 2011, 300). Reino sira ne'ebe Dom Ximenes Belo lista ona mak posivelmente sira ne'ebe submete ona ba ukun imperio portugues nian, maibe iha reino barak mos mak posivelmente seidak submete no la mosu iha lista oficial kolonial nian.

Notas finais

Timor tantu Lorosae (Timor-Leste) no Loromonu (Kupang) hetan regressu (hakiduk) kultural iha assuntu relasaun poder entre feto no mane tanba kultura militarismu Portuguese nian no pasifikasaun ba lideransa feto nian liu husi presensa ukun kolonial nian no liu-husi relijiaun patriarkal sira tantu Katoliku no Islam ne'ebé maske minoria iha Dili laran deit.

Jose 'Josh' Trindade (Trindade 2011) halo analiza ba kultura Lulik timor nian, hodi hamosu kritika ne'ebe klean tebes hasoru presensa relijiaun. Tuir Trindade relijiaun katolika ne'e patriarkal.

Primeiru, Biblia hakerek katak Maromak hasai husi Adao (mane) ninian ruin ida hodi hakiak feto. Feto ne'ebe Maromak kria ne'e ikus mai halo sala, tanba han sala aifuan ne'ebé Maromak bandu. Feto ninian situasaun sai at liu, bainhira nia fo mos aifuan hanesan ba Adao han, hodi hamosu pecado (sala) original. Feto ninian imajem identiku ho sala orijinal. Jerasaun ba jerasaun, feto sira lori nahatodan ida ne'e. Fiar ida ne'e kontraditoria ho fiar timor nian ne'ebe hare Maromak iha saseluk feto, maromak femininu.

Daruak, Igreja mos haklaken hanorin ida aprofunda tan liu husi orasaun ne'ebé obrigatoria ba timor oan sira: *Ami Aman iha lalehan...* ne'ebé ilustra Maromak nu'udar personalidade mane ne'ebe halakon Maromak feto tuir kosmolojia Timor nian.

Kontradisaun perspektiva Jose Trindade ho Igreja Katolika sai klean tebes, ne'ebé sujeitu ba analiza no debate iha tempu seluk. Enkuantu timor-oan sira simu fiar nain ida katak Maromak ida deit, *monoteismu* maibe feto sira ninian posisaun kiik-liu se laos marginal. Iha comunidade timoriana sira balun nian kosmolojia Maromak refere-ba Fulan no Loro (feminimu-maskulinu) kontinua sai tradisaun ba uma-lisan sira. Misionariu Katolika sira hahu sira nian evangelizasaun iha timor sentenariu XVI nian no mais tarde, Governador Celestino da Silva konstrui fatin ba Missao Jesuita no Canossiana sira iha Soibada tinan 1899, ne'ebe posivelmente kontribui ba pasifikasaun resistensia Nai-feto sira iha Timor-Lorosae (Durand 2009, 83), no sira hahu aprende idea ida katak feto sira subordinado ba mane sira.

Referensia

- Durand, F. 2009, *Historia de Timor-Leste: da Pre-Historia a Actualidade*, Lidel, Lisboa.
- Gunn, G. 1999, *Timor-Lorosae: 500 Years*, Livros do Oriente, Macau.
- Hill, H 2011, 'Gender Issues in Timor-Leste and the pacific Island: Pratical needs and strategic interest revisited', iha Leach, M. et al. (eds) *Peskiza Foun konaba Timor-Leste*, TLSA, Swinburne Press, Hawthorn.
- Mackerras, C. et al 1995, *Eastern Asia*, Second Edition, edited by Colin Mackerras, Longman, Australia.
- Magalhaes, A. 2007, *Timor-Leste: Interesses internacionais e actores locais*, Vol.1, Da Invasao austral-Holandesa a decisao autralo-Indonesia de anexar 1941-1974, IPAD, Lisboa.
- Trindade, J. 2011, 'Lulik: Valor Fundamental Timoroan nian, iha *Peskiza foun konaba Timor-Leste*', iha Leach, M. et al. (eds) *Peskiza Foun konaba Timor-Leste*, TLSA, Swinburne Press, Hawthorn
- Ximenes Belo, C. 2011, *Os Antigos Reinos de Timor-Leste*, Edicao Tipografica Diocesana Baucau, Baucau.